

SUID-AFRIKAANSE RADIOLIGA

SARLNUUS SONDAG 16 Maart 2003

U luister na amateurradiostasie ZS6SRL van die Suid-Afrikaanse Radioliga, die nasionale vereniging vir amateurradio in Suid-Afrika, met 'n nuusbuletin wat elke Sondag om 08:15 Sentraal Afrika Tyd (SAT) in Afrikaans en om 08:30 SAT in Engels uitgesaai word.

Hierdie bulletin is ook op die webwerf van die SARL by www.sarl.org.za en op pakketbulletinborde beskikbaar.

In die nuus vandag:

VERSKONING

SARL AJV

SARL BHF/UHF KOMPETISIE

OAKDALE ARK OPEDAG

INTEGNET 2003 VAN 30 MAART SAL JOU INSETTE BENODIG

SA AMSAT HOU AMSATKON2003 OP 10 MEI

Bly ingeskakel vir meer besonderhede hieroor en ander nuusitems.

Besoek ook die SARL-webblad of skakel die SARL-kantoor wat vanaf 09:00 tot 13:00 op weekdae oop is by telefoon 011 675-2393 vir inligting oor hoe om by die SARL aan te sluit, boekverkope en alle verwante amateurradio-aangeleenthede.

Die SARLnuusdiens nooi klubs en individue om nuus aangaande amateurradio aan news@sarl.org.za nie later as die Donderdag wat die bulletin vooraf gaan, in te stuur. Indien moontlik stuur dit asb in Afrikaans sowel as Engels. Let asseblief daarop dat vanaf Februarie 2003 nuusitems slegs aanvaar kan word indien dit na news@sarl.org.za gestuur word.

U luister na ZS6SRL.

STIL SLEUTEL

Dit is met leedwese dat die Raad van die SARL die afsterwe van Jan Zandberg ZS4JZ, in die ouderdom van 71, op Maandag 10 Maart 2003, aankondig. Jan en sy boesemvriend, Dolf Lloyd, is vroeg Maandagoggend wreed vermoor. Die Raad betuig sy ennige meegevoel met die familie en vriende van die Zandberg gesin.

POUSE

Die nuus volg in besonderhede:

VERSKONING

Die Raad van die SARL bied hiermee verskoning aan Mnr Kobus van der Merwe ZS6JPY en Mev Yvonne van Dijk ZR6TBL aan vir enige ongerief wat deur

die kennisgewing in die SARL AJV dokument veroorsaak is. Na 'n deeglike ondersoek is bevind dat Reel 16.3(i) nie van toepassing is op Kobus nie en dat Yvonne 'n opbetaalde lid van die SARL is. Die SARL is jammer oor die misverstand.

SARL AJV

Die SARL AJV word op Saterdag 29 Maart 2003 by die Ontspanningssaal te Lugmagbasis Bloemspuit (LMB), net buite Bloemfontein, gehou. Op Vrydaggaand 28 Maart word 'n ken-mekaar vanaf 18:00 tot 21:00 SAT by die saal gehou en 'n kontantkroeg sal beskikbaar wees.

Saterdagoggend word die SARL AJV gehou. Na afloop van die AJV het die Bloemfontein RAK 'n vlooiemark/kattekakverkoop beplan asook 'n aantal lesings. Almal is welkom om items saam te bring vir die vlooiemark. Belangegroep is ook welkom om die Bloemfontein RAK te kontak as hulle tydens die middag 'n vergadering wil hou, bv die BHF/UHF Belangstellingsgroep.

Die SARL Dinee sal ook in die Ontspanningssaal plaasvind en die Offisiërsmenasie van die LMB Bloemspuit hanteer die spyseniering. Daar sal 'n kontantkroeg wees en die drag is "smart casual".

Vir behuising in Bloemfontein kan lede Mev Veronica Otto, tydens kantoor ure asseblief, kontak by 082 890 0677. Vir die met karavane kan Maselspoort by 051 441 7848 of Reynekepark by 051 523 3888 gekontak word. Beide hierdie plekke het ook chalets. 'n Inligtingstuk word weer per e-pos aan klubs gestuur.

SARL BHF/UHF KOMPETISIE

Die eerste been van die gewilde SARL BHF/UHF Kompetisie vind hierdie naweek plaas. Die kompetisie het om 12:00 SAT gister begin en eindig vandag, vier-en-twintig uur later, om 12:00 SAT. Aktiwiteit is op GG, ESB en FM op die 6-meter, 4-meter, 2-meter, 70 en 23 cm bande. Neem kennis dat die 4-meterband vanaf hierdie jaar ingesluit is - 70,000 tot 70,300 MHz. Ondersteun gerus die deelnemers deur met hulle kontak te maak.

OAKDALE ARK OPE DAG

Die Oakdale ARK sal op Saterdag 29 Maart 'n ope dag hou by die Oakdaleklub, Bloemhofweg, Bellville. Alle radioamateurs sowel as hulle gades en vriende word hartlik uitgenooi.

Hierdie geleentheid is een van 'n reeks soortgelyke aktiwiteite wat georganiseer word met die doel om die individuele amateurs aan te moedig om betrokke te word by sy plaaslike klub en ook om interklubverhoudings in die Wes-Kaap te bevorder.

Kroegfasiliteite sal beskikbaar wees, asook 'n verskeidenheid heerlike middagetes vanuit die klub se kombuis. Braaivleisvure sal ook beskikbaar wees. Vlooiemarkfasiliteite sal beskikbaar gestel word, met tafels beskikbaar op 'n "eerste kom, eerste maal" basis.

INTEGNET 2003 VAN 30 MAART SAL JOU INSETTE BENODIG

Die SARL Integnet 2003 wat op 30 Maart gaan plaasvind, lyk heel verskillend en sal heelwat insette van die luisteraars benodig. Die onderwerp vir bespreking sal gaan oor wat radioamateurs kan doen om aktiwiteit op die lug te bevorder. Dit sal nie 'n vraag wees van wat hulle, SARL, SAATI, AMSAT of die klubs moet doen nie maar: “Wat kan ek as gelisensieerde radioamateur doen om my stokperdjie te bevorder en te ontwikkel?”

Sluit aan by die bespreking op 30 Maart wat om 20:00 begin op 'n herhaler naby jou of op 3718 kHz. Klubs wat hulle herhaler wil koppel moet die besonderhede van die telefoonnommer wat gekoppel moet word deur die Telkom Telekonferensiesentrum, die frekwensie van die herhaler en die dekkingsgebied aan armi@sarl.org.za stuur.

RADIO ZS

Die Januarie/Februarie 2003 uitgawe van Radio ZS is tans by die drukker en sal eersdaags op pad wees na die lede. Die redakteur bied verskoning aan vir die vertraging. Gereelde rubriekskrywers en alle lede word gevra om artikels teen die einde Maart aan die redakteur te stuur vir die volgende uitgawe van Radio ZS. Die artikels, in Afrikaans of Engels, kan gestuur word aan zs4bs@netactive.co.za of na Posbus 12104, Brandhof, 9324.

SA AMSAT HOU AMSATKON2003 OP 10 MEI

SA AMSAT gaan 'n amateursatellietkonferensie in Gauteng hou op 10 Mei. Wat vroeër 'n jaarlikse instelling was sal heringestel word om belangstelling in amateursatelliette te stimuleer en om nuwelinge te help om meer te leer van hierdie fassinerende deel van Amateurradio. Bekend as AMSATCON2003 (Amateursatellietkonferensie 2003) sal die konferensie iets vir die belangstelling van elke radioamateur bied. 'n Vergadering om SA AMSAT vorentoe te neem sal die konferensie in die laatmiddag volg. Daar word tans om borgskap onderhandel sodat die registrasiefooi so laag as moontlik gehou kan word.

Voordragte word ingewag. Stuur asb 'n kort opsomming aan hans@intekom.co.za teen 30 Maart. 'n Volledige program en registrasievorms sal vroeg in April beskikbaar wees.

COLOMBIA RADIOLIGA ONTBIND DALK.

Colombia se Radioliga kan dalk ontbind word. Dit is deels te wyte aan finansiële probleme wat die radioamateurs in daardie land ondervind, wat veroorsaak dat die ledetal kwyn. Met die laaste telling was daar slegs 200 lede van die liga en die syfers daal nog steeds. Ontbinding kan oa. veroorsaak dat daar geen buro meer sal wees nie.

FREKWENSIEBEPLANNING

Die Raad van die SARL werk nou saam met ICASA en die Department van Kommunikasie aan frekwensiebeplanningsake. Die SARL het reeds twee voor-

leggings aan hierdie organisasies gegee wat die SARL se posisie in verband met die 40-meter harmonisering asook die PMR 430 - 440 MHz uitstip. ICASA het die versekering gegee dat die SARL 'n deel van die forum sal wees wat hierdie sake hanteer.

SPEZIALE GELEENTHEIDSTASIE TYDENS KRIEKET WêRELDBEKERTOERNOOI

Onthou om 'n poging aan te wend om kontak te maak met ZS03CWC, die spesiale geleentheidstasie wat tot 23 Maart op alle bande deur die Oakdaleklub bedryf word.

ZS-stasies kan QSL's stuur aan ZS03CWC, Posbus 2132, BELLVILLE, 7535, en DX-stasies kan dit stuur aan ZS1AU by QRZ.COM. Sluit asb 'n gefrankeerde koevert met u eie adres in vir 'n spesiale QSL-kaart wat na die 23ste Maart beskikbaar sal wees.

VERANDERING IN FREKWENSIE EN TYD VAN ARMI-UITSENDINGS

Net 'n herinnering daaraan dat vanaf 30 Maart die uitsending van Amateur Radio Mirror International om 10:00 SAT op 17815 kHz en 9750kHz sal geskied in plaas van 21560 kHz. Vanaf 31 Maart sal die heruitsending op Maandagaande om 21:00, di een uur later as tans, plaasvind maar die frekwensie sal onveranderd 3215 kHz bly.

Hierdie bulletin is saamgestel deur Gustav, ZS6BWN en gelees deur vanuit as 'n diens aan radioamateurs, kortgolfluisteraars en elektronikaentoesiaste.

Die SARL nooi u ook om Sondae om 10:00 na Amateur Radio Mirror International op 21560, 9750 en 7082 kHz en 145,625 MHz in die Oos Londen-, 145,650 in die Durban- en 145,750 MHz in die Pretoriagebied te luister. 'n Heruitsending kan Maandagaande om 20:00 SAT op 3215 kHz gehoor word. ARMI word deur Telkom en Sentech geborg.

U het geluister na ZS6SRL, dankie dat u by ons aangesluit het. Baie dankie aan diegene wat items vir die bulletins verskaf en aan al die amateurs wat so gereeld die herleidings waarneem.

Hierdie Afrikaanse uitsending eindig nou en SARLNUUS wens u 'n aangename week toe.

Totsiens almal.

/EX